

## CANONES.

### *Vegetabilia indigena et adventitia culta*

quotannis recentia, tempore sereno, a rore vacua colliguntur, indigena vero spontanea, nec usquam culta; collecta mundantur; mundata loco aëri pervio, aut filis suspensa aut linteo papyrove subjecto tenuibus stratis diffusa, diligenter siccantur, et quidem succulenta modici caloris ope, cetera aëris temperaturâ, ita tamen, ut colore mutabilia nullo sole afficiantur; perfecte siccata cum ceteris vegetabilibus, loco sicco frigidoque, vel in scriniis ligneis vel in vasis vitreis, murrhinis metallicisve bene clausis, servantur, ut et lux atque humiditas partesque pulverulentæ, quæ aëri insunt, quantum fieri possit, defendantur, et suus cuique color, suus odor et sapor melius ac diutius constet. Pharmaca aromatiea, narcotica et alia, materie volatili prædita, in vasis vel scriniis ita servantur, ut nulla aëris mutandi fiat occasio.

E *Pharmacis exoticis*, quorum plures inveniantur species, prima quæque et præstantissima comparantur.

*Radices* perennes e plantis bimis trimisve, tempore autumnali, herbâ jam marcidâ vel fo-

liis delapsis, optime colliguntur, quod idem vernali tempore ante foliorum evolutionem fieri licet; celeriter lotæ et mundatæ vel in aëre, vel, si crassiores sunt atque succulentæ, incisæ filisque suspensæ, modici caloris ope siccantur. Radices spongiosæ, cavæ et, si fruticum arborumque excipias, lignosæ rejiciuntur.

*Bulbi* itidem ut radices collecti, in retibus suspensi vel sabulo probe sicco immissi, recentes servantur.

*Cortices et Ligna* tempore vernali ante frondescentiam colliguntur, cortices autem plerumque e ramulis fruticum arborumque bimis, trimis, quadrimis.

*Herbæ et Folia* bene explicata, paullo ante florescentiam, vel, si aromatica sunt, eo ipso tempore, quo florent, colliguntur, plantarum tamen biennium etiam sub finem æstatis primæ. Folia succosiora et narcotica, ut Digitalis, Belladonnæ, cet., singula a se disjuncta, herbæ vero in parvos fasciculos colligatæ, filis suspenduntur et siccantur.

*Flores et Summitates florentes*, ut primum explicantur, colliguntur et, quum citius quam ceteræ plantarum partes mutantur, summâ diligentia siccantur et conservantur.

*Fructus et Semina*, matura plerumque, eliguntur, fructus tantum succulenti paullo ante summam maturitatem. Hi integri vel incisi, ca-

loris modici ope, celeriter siccantur. Semina quædam in pericarpis conservare præstat. Aromatica et oleosa citius, farinosa serius depravantur.

---

Medicaminum quantitates pondere tantum æstimandæ, non mensurâ aut guttulis. (Excipe Aetherolea in Elæosaccharis parandis).

Pondera liquidorum specifica ad temperaturam  $+15^{\circ}$  thermometri centigradi vel Celsiusiani exploranda sunt.

Inter ceteras libras, in officina necessarias, semper sit libra, non manibus habilis, sed apto suspensa firmamento tamque mollis, ut eâ possit grani pars octava ponderari accuratissime. Pondera hujus libræ potissimum platinica sint (aliud granorum decem, aliud quinque, aliud duorum, aliud geminum grani unius, aliud dimidii (gr.  $\frac{1}{2}$ ), aliud quartæ (gr.  $\frac{1}{4}$ ), aliud sextæ (gr.  $\frac{1}{6}$ ), aliud denique octavæ grani partis (gr.  $\frac{1}{8}$ )) et in theca, ne mutantur, sollicite servanda.

Bina singularum librarum brachia ne sint in tenues producta hamulos, quibus adfigantur lances; eaque adeo sint ad æquum exacta, ut utracumque lancula rem ponderandam acceperit, idem omnino pondus significetur.

---